



LA PATRIE DAL FRIÛL

SFUEI MENSÎL INDIPENDENT

Direzion e Aministrazion - Udine - via del Cotonificio 129

Tassa pagata / Taxe perçue Udine Italy - mensile / mensil spediçion in abonament postâl Poste italiane s.p.a.

LINT AUTONOMISTE



Il logo che al ruvine la anime di un popul

Dree Valcic

❖❖ Ejeuneimagjincheinemisdal Friûl no rivin propit a sopuartâ: chel vessil blu cun parsore la acuille patriarcjine. Cuant che le viodin che e svintule pardut intes ocasions plui variis, i antifurlans a vegnin cjapâts di atacs acûts di une alergjie degenerative, che ju cjape cence remission ogni volte che le cjatin fissade dai obietîfs des fotocjamaris e sparnicadis sui social.

❖❖ Simpri plui dispès nol è viaç, event privât o public meritevil di considerazion che al ven doprât come testimoniance personâl di un ricognossiment identitari: e là che chest al sucêt, e je simpri la bandiere furlane a marcâlû.

❖❖ Par chest chei che a àn voie di gloti il Friûl e di fâlû disparî, a scuegnin stropâ cheste buse, e par parâ il colp a cirin di sminuî la impuartance dal so significât: lu starozin inte dimension di un at banâl cence valôr, ma nancje chest al è avonde. Sì, parcè che il fenomen no si ferme, anzit, plui lu ridusin a alc di folcloristic, plui la mode si slargje e e devente une sorte di rît, une vere e proprie tradizion che si trasmet di pari in fi.

❖❖ Ducj i nemis dai furlans che no si rindin a san trop che e conte cheste identificazion, e trop che e pues inlidrisâsi e difondisi in maniere capilâr, diventant une forme sigure di rapresentâsi e di identificâsi: par chest a vuelin scancelâle.

❖❖ Come che a insegnin i manuâi de controinformazion e de vuerilie psicologjiche, la miôr maniere par intosseâ cheste spontaneitât identitarie e je confondi lis aghis, rindilis turbidis, cun elements che intun prin moment a puedin someâ inocuis, ma che a son invezit velenôs come la muardude di un sarpint o l'asei di une jespe.

Par esempli si è fate une fieste grandonone a Çopule par Giada Rossi, medaie di aut tal ping pong aes resintis paralimpiadis di (al va indenant a pagj. 2) ▶



EDITORIÂL

A l à fat une vore di scjas l'articul scrit su la "Patrie" di Setembar di Marco Moroldo, furlan che al vîf in France e che al à insegnât ai siei fis la marilenghe. Tornât a Morteian pes vacancis di Istât, al à provât a cirî cualchi zovin o cualchi frut che al fevelàs furlan cui siei fantats, ma la sô e je diventade une "mission impussibile". Nissun al à mostrât di volê cjacâr in marilenghe cun cheste famee di furlans di inaltrò. Parcè? I nestris letôrs si dividin: a son chei che tal lôr país a viodin ancjemò la canaie fevelâ par furlan, soredu in famee ma ancje a scuele e intal zûc, e chei che invezit si cjatin dacuardi cu la analisi di Moroldo e che a fevelin di un Friûl destinât a disparî in curt. In particolâr nus a colpît la reazion di Paride Radivo, un nestri abonât che cun displasê al note che a Moroldo "i scuen dâi reson! Tra 20 agns il furlan e lis sôs varietâts no esistaran plui!" e al zonte "O podarès fâ tancj esemplis di "disinterès" pe nestre lenghe. Dome un fat, capitât pôc timp indaûr: intune farmacie de Cjargne, lis

NO STIN A COLÂ INTE VUATE DE INDIFERERENCE

Walter Tomada

farmacistis, zovinis e cjargnelis, si cjacaravin tra di lôr par talian e ancje cui utents, int dal puest che e fevele dute la nestre marilenghe, soredu i anzians". "O sin in vie di estinzion", al siere cuntun tic di marum: un marum che al è cussî condivisibil che o vin sielzût di dâ vôs ae sô delusion.

❖ Ma isal pardabon dut pierdût? O stin rivant al pont plui bas tal numar di furlans che a fevelin la lôr lenghe, ma di ce che o savin in tiermins cualitatîfs e

quantitatîfs dal ultin scandai fat de ARLeF a son ancjemò grups di resistance une vore fuarts dulà che e vâl la pene di peâsi: a son imprescj gnûfs che a van doprâts e promovûts, la certificazion e permet di vè personâl preparât te scuele, te comunicazion e tes impresis, e ancje la valorizazion economiche e turistiche de lenghe e à un potenziâl grandonon. Ma cemût si fasial a lavorâ par chest, a domandâlu, a pretendilu, se par prins no sin nô a crodiî? Se par

prins o sin nô a pandi indiferece pes nestris lidris, a fâsi gloti dal gorc de omologazion (globaliste o nazionaliste taliane che e sedi), cui varessial di vignî a salvânus? Di simpri te lôr storie i furlans a àn scugnût judâsi di bessôi. E je àn simpri fate: no cate lis dificolâtis, invasions, disastris e ogni disgracie che ur è tocjade, i furlans a son ancjemò achî. A son stâts bogns di no rindisi, di tignî dûr, di cjalâ indenant e dâi cuintri a un destin che nol someave dâ nissune pussibilitât di sorevivence.

❖ Se a crodaran te lôr identitât e tai valôrs che e à semenât tai secui, salacor resisti al sarâ pussibil ancjemò une volte e ca di cualchi an a Morteian e intes farmaciis de Cjargne si tornarà a pandi une lenghe che e je spieli de nestre specialitât di popul. Une specialitât nassude, cressude e tramandade cuant che o jerin puars: vino di pierdile inte ete dal nestri benstâ? Se al sarâ cussî, e sarâ dome colpe nestre, parcè che invezit di pontâ a marcâ la nestre diferece, o sarin colâts te vuata plui pericolose, chê de indiferece. ■

❖ a pagjine 3

MESTRIS

Intervistis a personaçs de culture furlane su chei che a son stâts i lôr riferiments di Dree Venier

❖ a pagjine 5 e 12

VIZIS E VIRTÛTS E CJARGNELAS

Dôs gnovis rubrichis par cure di Diego Navarria e Agnul Floramo

❖ a pagjine 7

IL LUNARI DI OTUBAR

La cusine, i Sants, la fieste, i proverbis, i lavôrs de tiere... par cure di Mario Martinis

❖ a pagjine 00

GOLE DI FURLAN

... inte rêl La presence de marilenghe sul "web" e cres di Serena Fogolini

LINT AUTONOMISTE

(al va indenand de prime pagjine)

Il logo che al ruvine la anime di un popul

Dree Valcic

Parîs: une fantate nassude a San Vît, furlane doc, e ven mostrade intune fotografie "uficiâl" cu la bandiere dal Friûl. Ma no je la solite bandiere, dongje de acule e à il logo basâr di "Io sono Friuli Venezia Giulia" cul tricolor che nol jentre propit nuie. Parcè? Cualchidun al varà conseât di doprâ la foto di une atlete tant stimade e amade inte sò tiere par une operazion che no je identitarie, anzit... E je une maniere di ruvinâ un simbul cuant che no si è bogns di scancelâlu!

*** Pensait aes dôs societâts di serie A che o vin, aes maiutis dal Udine aesquadre feminine di bale a svol dal Talmassons: l'assessor Bini e il president Fedriga a batin cence padin marcant il rûl strategic di chel logo dal pont di viste comerciâl. Il governadôr al va indenand: intune interviste al considere la operazion il plui grant sucès de sò amministrazion, e i crôt cussi tant che nol mancje mai di meti la felpe e la barete ancje tes occasions uficiâls.

*** Ma nol baste chest par mudâ la piel a dut un popul: insot no sin ducj "effevugins"... Ancje se dome a pronunziâ chest adietf al ven di ridi, chescj ca mighe a schercin... ■

INT DI CJARGNE

Emiliano Maroncelli, il zîr de Cjargne in 300 bôçs

Marta Vezzi



O sin lâts tal Comun di Cjavaç par fâ une cjarade cul apicultôr Emiliano Maroncelli che tal 2012 al à viert la sò aziende agricole. Nus conte che "la passion pes âfs e jere nassude za prin, tal 2002. Cul passâ dal timp o ai let libris, fat cors e prime di vierzi la ativitât o ai ancje fat un tirocino a Verzegnis, li dai fradis Marzona. Cui miei apiaris o preferis stâ te zone montane e culinâr dal Friûl, mi soi sbassât massime ae zone di Udin. Di doi

agns o quarti lis âfs ancje a cuote alte. Dal an passât o soi jentrât a fâ part dal presidi de mil di mont alpine alte Slow Food: il presidi al cîr di valorizâ e rilancjâ la mil di mont alpine sore i 1400 metris. Cui miei apiaris o rivi a cuvierzi i cjanâi di Aupe, Pontebe, Resie e Dean".

◆ Nol è un mistîr facil: "In cheste ativitât no si cjale mai l'orlo. Purtrop a son un pôcs di agns che la produzion no va benon par cause dal timp stramp. Chest an

al è stât il piês di ducj parcè che il timp al à condizionât in maniere impuartante la produzion: o ai scugnût alimentâ lis âfs che nus àn prodot la mil, e al è stât un vèr disastri. Il lavôr dal apicultôr al è impegnatîf so redut par me che o soi di bessòl e che o scuenu gjesti la ativitât dal apiari, dal laboratori e de vendite dai prodots. Cu la anade juste o rivi a produci plui varietâts di mil: mont alte, agace, tei, cjaminâr e "la mil des 4 valadis": aiar,

cjariesâr e tale. Il grues dal lavôr al è concentrât dal mê di Març a Avost/Setembar. Vie pal Invier di solit si fâs un control e si da di mangjâ aes âfs. La robe miôr e sarès che l'Invier al fos frêt, cussi lôr a stan dentri e no si consumin. Se l'Invier al è clip lis âfs a jessin e lant ator si consumin". In dut, al conte, "o ai cirche 300 bôçs (tancj ju dopri par rinfuarçâ lis fameis plui debilis). Il prodot si lu cjate in cualchi buteghe de zone cjarnele ma o procuri ancje di puartâlu a domicili su domande e lu vent in cierts marcjâts".

◆ Cun di plui Emiliano al fâs ancje servizi di disinfestazion dai calavrons e des jespis. E je ancje interessante la part didatiche: Emiliano al crôt che al sedi impuartant fâur cognossi il mont des âfs ai fruts e cussi tor Avril/Mai al organize progjets in colaborazion cu lis scuolis de infanzie e primariis de zone: "Mi da un grum di sodisfizion lavorâ cui fruts. A son come sponzis e a cjapin sù dut! I fruts des scuclutis a son chei plui ricetifs ancje parcè che i miei progjets a son une vore pratics: ur fâs viodi e tocjâ la cere, ur fâs viodi lis diferencis che a son fra âfs e jespis, tocjâ i cheles, sinti il cjant de regjine, cerçâ la mil dopo vèle fate tirâ jù dai telarins e i fruts a son atirâts di dutis chestis robis. Al è un lavôr impegnatîf ma o crôt che al sedi une vore impuartant rivâ ai fruts".

◆ Par altris informazions e par inzornaments si pues viodi la pagjine Facebook: <https://www.facebook.com/profile.php?id=100054607202720>. ■

GLESIE FURLANE 50 AGNS

La diocesi "autonome" di Vençon

Tonin Cjapielâr

A i tîmps dai arcivescui Alfredo Battisti (1972-2000) e Pietro Brollo (2000-2009), cualchidun al sostignive che i predis di Glesie Furlane no apartignivin ae arcidiocesi di Udin ma ae diocesi di Vençon. E no vevin ducj i tuarts.

◆ Il motif al è semplic: Vençon al jere la sede dai nestris incuintris, cul so domo consacrat dal patriarcje Beltram ai 2 di Avost dal 1338 e in posizion centrâl fra la Cjargne e la Basse. In plui al rezeve la plevanie, e le rêç, bons. Roberto Bertôs: simpri splendid tal vierzinus cûr e puartis.

◆ Il grup di GF al començave a cjatâsi in Setembar cuntune corierade di int che e partive par cualchi lûc simbul de storie di Aquilee; dopo, e vignive fate une zornade par meti adun il program dal an. Come lûc si sielzeve un stali a Riu Vert dongje di ForDisot, o une canoniche di cualchi altre bande. Di Otubar a Lui al jere

il vèr an pastorâl: si cjatavisi un domenie par mê di dopodimisdi a Vençon par rifleti e discuti sul argument dal an. Si cirivin relatôrs competents cence cjâlâ se a jerin catolics o no. La lôr professionalitât nus bastave. La partecipazion e jere buine: in medie 60 - 80 di lôr. I ats a vignivin publicâts. Mi plâs ricuardâ: La pastorâl dai pais piçui (an 1988), Bibie libri di Diu libri de int (1989), La tiere e je di Diu e nô o sin fituâi (1990), O jeri par e o vês viodût di me (1991), Famee: mito o vocazion? (1992), Vite e Bibie (1994), Diaspore (1995).

◆ I nestris incuintris a finivin par solit tal Cafè Vecjo, li che une cuindisine di nô si fermave par cene. Si sierave tor undis di gnot cjantant vilotis e cjants di glesie miscljâts, ma dut in maniere une vore corete par vie che sul cjant cun pre 'Sef no si sgarave. I vescui a vignivin visâts par ogni incuintri ma arispuindevin

che di domenie dopodimisdi a jerin cjamâts di lavôr. Però mai une volte in tancj agns nus àn proponût: "Fasin un incuintri vie pe setemane". La Vite

Catoliche e publicave l'avis tun cjantonut o tal spazi di un bol, ma lu metevê.

◆ Fra i tancj incuintris, o quarti ancjemò la sodisfizion de Letare scrite al pape Zuan Pauli II pal ricognossiment des lenghis di cul te liturgjie in ocasion dal so viâç in Friûl tal 1992. E jere compagne di 13.000 firmis; le veve dade dongje un biel trop di int e le vin studiade e metude jù insiem peraula dopo peraula. Mi è restade intal cûr ancje la "Semblee dai predis dade dongje dal Grop, Udin, Seminari 2-3 di Setembar 1985". A àn partecipât cuasi une quarantane di predis dal centri e de periferie: une robonone!

◆ Il nestri an liturgjic al veve come fonde e culmin la messe pe solenitât dai sants Macôr e Fortunât, te basiliche mari di Aquilee te domenie dopo dai 12 di Lui. Altris fiestis che si partecipave: la prime domenie di Avost pe sagra dal patriarcje



1974-2024

Bertram a Vençon, o ancje la messe de vee de Sunte in Guart o il prin di Mai a Resie. Tai incuintris de domenie si cjantave tant vultîr i Jespui tes melodiis che pre 'Sef al veve parecjât. Ogni an

dopo Pasche o fasevin une rogazion te campagne sot il patrocini di pre Renzo Dentesan. Di chei agns però o sint ancjemò la emozion de celebrazion a Gris, te Capele Sistine dal Friûl, in ocasion de presentazion dal completament de grande opare de Bibie (an 1993). Liturgjii che a jemplavin anime, cûr e vite.

◆ Dut al vignive fat cun determinazion e cence pôre. Par noaltris, culture populâr, la difese de int, valorizazion dal popul e de identitât furlane, une glesie locâl incjarnade in cheste tiere... a jerin il pan quotidian e o metevin za in pratiche in chei tîmps lis peraulis che pape Francesc al à proferît a Dili, capitâl dal Timor Est, ai 10 di Setembar di chest an: "Mi hanno detto che su alcune spiagge arrivano i cocodrilli. Essi hanno un morso molto forte. Attenti ai - cocodrilli - che vogliono mordervi cambiandovi

la storia e la cultura. Tenetevi lontani da essi, perché mordono molto". Peraulis sacrisantis ancje pal Friûl. E tune altre omelie, simpri ai zovins, il pape al à dit: "Fate chiasso, perché il vostro chiasso è il frutto dei vostri sogni". Noaltris, in chei tîmps, o jerin chêt zovintût li. Vescui, curie di Udin e GF: scuintris e incuintris, polemiche e dialic, gloti e berlâ a jerin a puartade di man; merits e fai a son stâts di dutis dôs lis bandis. Il timp al passe e ancje lis buliduris si smamissin; o pensi però che un pecjât al resti e che al fasi ombre tal nestri sisteme gleseastic: il vè proibide di agnorums incà la lenghe mari te liturgjie, te messe, tal messâl, tai sacraments, tai salms, tai marums dai puars, te Liturgjie des Oris. Chel, pal cristian, al è il lûc specific e privilegât de cussientizazion, formazion e maturazion di popul di Diu. Il rest a son curis ancje bielîs ma paliativis e si viodin i risultâts. Il Signôr perdonarai chest tradiment, delit cussî penç? Cumò ducj a cjacarin dal *Ius soli* e *Ius scholae* e ancje in Friûl si començarà a meti di dirit te scuele lis lenghis hindi e afar. Intant o lassin murî il nestri furlan, sloven, todesc! Cetant incocalts e puars che o sin! "Vuardaiti dai crocodii! Fasêt scjas e davoi!" nus berle pape Francesc. ■

“Se no si fevele inte place, une lenghe e je za in menace”. E podarès jessi une gnove detule buine par tacà a fà sù un pocje di cussience linguistiche populâr, viodût che no podin lâ indevant a platâ il cjâf sot dal savalon: ogni an, il furlan al pierd une percentuâl di int che lu fevele (stant aes ultins indagjins, la medie e sarès dal 0,6% ad an, ancje se lant a viodi i dàts dal 1977 e chei dal ultin scandai dal 2014, la percentuâl di fevelants regolârs e je passade dal 75% al 48%). E je vere che, biadelore, lis opinions sul cont de lenghe a son mudadis, cuntune vision simpri plui slargjate al plurilinguism, ma chest nol gjave il fat che il “po si po” al sedi daûr a rivocâ simpri mancul te nestre tiere. Il furlan, in di di vuê, al è stât ricognossût de UNESCO tant che lenghe in pericol seri (rapuart dal 2009), intune conferme no dome dal numar simpri plui bas di fevelants, ma ancje de manciance di transmission intergenerazionâl (e no stin a fevelâ dal insegnament te lenghe mari, che di chel o ‘nt fevelarìn tune prossime pontade).

◆ Lis placis sono daûr a disvuedâsi de nestre lenghe? Chês dai paîs forsît sì, ma chês virtuâls, in cuintritindince su dutis lis spietis, a somein ‘siminâ di vite. Une resistance zuarine e trapolone, che si slargje te rêt lant ae conquiste di pagjinis e social, cimiant simpri di plui ai zovins.


◆ Lassant di bande i sîts istituzionâi dai ents che a àn a ce fâ cu la lenghe furlane (a proposit: no stait a dismenteâsi di dâi un cuc ae nestre cjase virtuâl, ancjemò plui bieles e siore di contignûts), il furlan

GOLE DI FURLAN...

... inte rêt

La presince de marilenghe su la place virtuâl dal “web” e cres

Serena Fogolini



PARSORE YOUPALTUBO, IN BANDE, “TIC E TAC FURLAN” CUN GRETA FABBRO E SOT LA PAGJINE FB DI AVERAGE FURLAN GUY



prime al à rivât a conquistâsi un so puest jenfri lis lenghis de tastiere, par dopo rivâ a jentrâ tal cjâf di Telegram e ancje di Facebook (se no le vês ancjemò provade, lait a sgarfâ tes impostazions), che po al è ancje il social plui vivarôs par “cjacará”, ancje se no mancjin lis esplorazions intes tieris di TikTok (“Tic e Tac Furlan” cun Greta Fabbro), di



YouTube (“YoupalTubo” al è dome l’ultin di tancj altris canâi li che si pues cjatâ il furlan) e di Instagram.

◆ E se o crodês che a sedin dome fufignis digitâls, us din cualchi numar di trop che a plasin lis pagjinis FB plui popoladis:

- Average Furlan Guy, 108.000 mi plâs (pagjine di zovins par fâsi cuatri ridadis, ancje cun auto-ironie)

- La Patrie dal Friûl, 28.000 (âstu metût il to “mi plâs”?)

- Il grup “Achì, si scrîf e si rît NOME par furlan (e par cjargnel)”, 22.500 membrs (par ridi, ma ancje par imparâ alc de lenghe)

- ARLeF, 20.200 mi plâs (pagjine de Agenzie regjonâl, che però si gjave vie la golarine istituzionâl par proponi zûcs e interagjî cul public)

- Ente Friuli nel Mondo, 18.500 (cu lis gnovis dai Fogolârs furlans tal forest)

- Radio Onde Furlane, 9.100 (par jessi inzornâts su lis trasmissions ma ancje sui events)

- Societât Filologicje Furlane, 8.100 (cun informazions su events e publicazions)

◆ In sumis, al somee che la muart no sedi propit cussì dongje a vignî e che la ultime bataie, forsît, o varin propit di zuiâse in cheste maniere. E voaltris, sêso prons a impugnâ la vuestre suris tant che spade? ■

GOLE DI FURLAN...

Interviste a Anna Romanini e Mauro Urli, aministradôrs di un dai grups plui vivarôs de rêt

S. F.



Ai 11 di Otubar dal 2017, Anna Romanini e Mauro Urli a davin vite a un grup Facebook clamât “Achì, si scrîf e si rît NOME par furlan (e par cjargnel)”, cun chês di puartâ indenand la lenghe furlane ancje sui social e di tignî dongje i furlans ator pal mont. In di di vuê, chest cjanton di internet al è un dai plui ferbints e ancje atîfs intal doprâ la lenghe par comunicâ te rêt.

Si spietaviso dut chest sucès in

cussì pòcs agns?

A di il vèr, se o vessin aprovâts ducj chei che a fasin domande par jentrâ tal grup vuê, o varesin di sigûr almancul 60.000 iscrits, ma noaltris o cjapin par bon dome cui che al rispunt par furlan ae domande che e ven fûr cuant che si domande di iscrivisi. Cun di plui, o vin scugnût rindi il grup privât par evità che tancj a jentrassin cence aprovazion, duncje cui che nol è iscrit nol pues plui viodilu e condividi ce che al ven publicât, si che lis domandis cumò a son ladis al mancul.

Parcè vèso marcât chel “par cjargnel” intal titul?

Parcè che in Cjargne e je une fuarte identitât locâl. Al è vèr che il cjargnel al è une des tantis varietâts ma la int si sint prime cjargnele e daspò furlane. Fevelant di un de culinâr o de basse, tancj di lôr a disin: “al è di jù, dal Friûl”.



Par doprâ une batude di Catine, un cjargnel al dîs “sta cidin, tu, che tu sês un 0432”!

Cui si iscrivial tal grup? E cun trope frecuece partecipino i iscrits?

La medie de età e va dai 50 ai 60 agns, une vore alte. Su 22.500, chei che a scrivin dispès (cuasi ogni di) a saran uns cent di lôr, chei che a publichin cun frecuece la metât, tancj di plui chei che a viodin posts o coments e che a metin un “mi plâs”.

Cuâi sono i contignûts che a àn plui sucès?

Il grup al è nascût sorendut par fâ cuatri ridadis. E alore benvignudis lis batudis o lis vignetis ma a àn di jessi par furlan. Daspò si puedin publicâ fotografiis o filmâts che a vedin a ce fâ cul Friûl. Tancj posts a vegnin scancelâts parcè che no risprietin il regolament o parcè che a vegnin publicâts plui voltis in pòc timp. E sorendut al ven

scancelât dut ce che si cjate che nol è scrit par furlan.

O vin notât che cuant che si tirin fûr lis regulis de grafie al è simpri un tic di davoî tra i iscrits. Ce pensaiso di chest?

No si pues pretendi che ducj a savedin scrivi just. Tal regolament al è scrit che si puedin ancje fâ eròrs (ma se a son masse gravis, il post o il coment al ven scancelât). Ma cuant che si cîr di fâ capî cemût scrivi just, tante int si mustiche parcè che par lôr al va ben cemût che a scrivin lôr e no ur interesse di miorâsi. Tancj a disin che lôr a scrivin come che a fevelin. Va a fâur capî che il talian si scrîf compagn sedi a Udin che a Rome e Palermo, ancje se la fevelade locâl e je ben diferente di chês scrite!

Cemût funzionie la vuestre supervision?

Fra posts, vignetis e fotografiis publicâts ogni di si pues rivâ tra

i 20 e i 30. I coments a centenârs ogni di. I aministradôrs a van a controlâ se a son in regule cul regolament e se ce che al ven scrit al è par furlan. Par regolament, ancje nuie politiche e nuie barufis.

Il vuestri al è un biel impegn. Ce us daie la fuarce e la volontât di lâ indevant?

La sodisfazion di cîrî di mantignî vive la lenghe furlane. Clâr che l’impegn par mantignî il grup tes regulis e te educazion al è tant, in medie une ore e mieze in di par aministradôr, cualchi volte ancje di plui.

Se o tornassis indaûr tal timp, tornaressiso a creâ chest grup?

Sigûr che o tornaressin a creâlu! In grazie dal grup ducj i doi o vin imparât a scrivi par furlan o, almancul, si sin miorâts tant! E tancj iscrits a àn declarât di vè miorât il lôr furlan scrit. Cun di plui, in grazie dal grup o vin cognossude di persone (e fat cognossi) tante int ancje impuartante de culture furlane (scritôrs, professôrs, cjantautôrs e altris). Ogni tant si fâs cualchi cene; la ultime l’an passât a Tresesin cun 60 personis; une serade bielnone che e à vût par ospits ancje Walter Tomada, Diego Navarra, Dree Valcic, Sandri D’Osualdo, Walter Maestra e o vin podût cjantâ insieme a Dario Zampa. ■

**Par viodi chei altris contignûts
de “La Patrie dal Friûl”,**

abonaitsi. Dutis lis informazions si cjatin sul sît
www.lapatriedalfriul.org



**Per vedere gli altri contenuti
de “La Patrie dal Friûl”,**

abbonatevi. Tutte le informazioni si trovano sul sito
www.lapatriedalfriul.org

Che tu sedis za abonât o che tu le vedis lete dome cualchi volte,
aboniti o rinove l'abonament a un mensîl unic:

almancul une volte al mê, lei par furlan!

